

## Maleûrs d'one feume mariéye

Volà chî mwès qui dj'su mâriéye  
Vos l' savoz bin cosin, cosène  
Èt v'là qui dj' su bî-n-atrapéye  
Vos n'arez jamaîs crwèyu ça

Â ! Qui n' su-dje cor à nosse maujone  
Cosin, cosène  
Â ! Qui n' su-dje cor à nosse maujone  
Dj'î braîreûve co

Ç'a stî londi li djoû dol fièsse  
Il a riv'nu dau cabarèt  
Il a stî sô tot come one bièsse  
Tchiyant, r'naudant pa tot costès

I m'a falu ramonè ça  
cosin, cosène  
I m'a falu ramonè ça  
Ô ! Qué pourcia !

Vos l' savoz bin, cosin, cosène  
Qui dj' n'a rin yeû èn'don di s' costè  
Qu'one vîye payasse di paye d'awin.ne  
On vî tchôdron èt on satch trawè

Avou ça, i dit qu' c'è-st-à li  
Cosin, cosène  
Avou ça, i dit qu' c'è-st-à li  
Tot ç' qu'èst véci

Djè lî pètereû voltî dès tchoufes  
Quand djè l' vwè riv'nu dau cabarèt  
Avou s' laîd nez tot plin di chnouf  
En l' vèyant on sèrè disgostè

On dîrè l' cu d'one vîye bèrbis  
Cosin, cosène  
On dîrè l' cu d'one vîye bèrbis  
Qui tchît todi